

16 JAN 2001

Sukan-Ironman

KEJOHANAN IRONMAN SAKSIKAN DUA PERUBAHAN

LANGKAWI, 16 Jan (Bernama) -- Kejohanan Triathlon Ironman Malaysia tahun ini menyaksikan sedikit perubahan bagi segmen renang dan berbasikal bagi memberi keselesaan kepada atlet berikutan pertambahan bilangan peserta.

Penganjur kejohanan, Langkawi Ironman Endurance Marathon (LIEM) Sdn Bhd, telah menerima 315 penyertaan apabila penyertaan ditutup semalam berbanding 112 penyertaan tahun lepas.

Timbalan Pengerusi LIEM Zaba Aman hari ini berkata jarak bagi segmen renang tetap sejauh 3.8 km tetapi peserta tidak lagi perlu berenang berulang-alik sebanyak dua kali seperti tahun lepas, sebaliknya cuma satu pusingan untuk laluan berbentuk tiga segi.

Bagi segmen berbasikal, jaraknya tetap 180.2 km tetapi dibuat dalam dua pusingan mengelilingi pulau berbanding dua setengah pusingan sebelum ini.

Kali ini ia ditambah dengan laluan baru mengikuti jalan Pantai sejauh 6.5km, katanya kepada pemberita selepas majlis penyerahan tiga basikal kepada peserta Ironman Langkawi oleh Pengerusi Jawatankuasa Pembangunan Sukan Kedah Datuk Hassan Bulat.

Kejohanan itu merangkumi acara renang, berbasikal dan maraton sejauh 42.2km.

Ramli Nayan, 29, Hasbullah Mohamad, 29, dan Mansor Khamis, 38, menerima basikal bernilai RM10,000 setiap satu itu yang ditaja oleh Majlis Sukan Negeri Kedah.

Sementara itu, Hassan berkata kejohanan Ironman tahun depan dijangka menarik 500 penyertaan berdasarkan sambutan menggalakkan yang diterima dalam kejohanan tahun ini.

Kejohanan kali ini menyaksikan penyertaan terbesar dari Jepun seramai 100 orang selain 36 peserta profesional termasuk 12 peserta profesional wanita dan lebih 50 orang dari Eropah.

Katanya Perdana Menteri Datuk Seri Dr Mahathir Mohamad dijadualkan merasmikan majlis makan malam untuk meraikan peserta Ironman di Dataran Helang di sini pada 26 Jan.

Menteri Besar Kedah Datuk Seri Syed Razak Syed Zain pula akan melepaskan peserta kejohanan di kawasan yang sama pada 28 Jan.

Sultan Kedah pula akan menyampaikan hadiah kepada pemenang keesokannya di tempat yang sama.

-- BERNAMA

NH NMO